

Uunga siunnersuut: Inatsisartut inatsisaat nr. xx ulloq xx. xxx 2016 uumassusillit sananeqaataasigut kingornuttagaasunik isumalluutit tamatumunngalu atatillugu suliniutit.

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerneqarnera

Siunnersuummut siunertaavoq Kalaallit Nunaanni uumassusillit sananeqaataasigut kingornuttagaasunit isumalluutininik katersisarnerup, ilisimatusarnerup atuisarnerullu siuarsarneqarnissaat.

Nalilinnit uumassusillit sananeqaataasigut kingornuttagaasunit isumalluutininik atuinermi pilersinneqartunit, inuiaqatigiit kalaallit naleqquttumik annertussusilimmik pissarsiaqartarnissaat, peqatigisaanillu uumassusillit sananeqaataasigut kingornuttagaasunit isumalluutininut maani nunatsinniittunut ilisimasaqarnerulersitsinissaq paasisimasaqarnerulersitsinissarlu, siunnersuummi siunertaavoq.

Inatsisissatut siunnersuummut, Uumassusillit assigiinngisitaartut pillugit nunani tamalaani isumaqatigiissummi aamma Nagoya-mi isumaqatigiissummi tunngaviusut, tunngavigineqarput.

Nagoya-mi isumaqatigiisut uumassusillit sananeqaataasigut kingornuttagaasunit isumalluutininik atuinermut tunngatillugu nunani tamalaani tunngaviusunut nutaatut tapiliussaavoq, aammalu nunap suminngaaneerfiusup uumassusillit sananeqaataasigut kingornuttagaasunit isumalluutininik atuinermi nalilinnit pilersinneqartunit naleqquttumik naapertuilluartumillu pissarsitinneqartarnissaata qulakkeerneqarnissaa, aammalu uumassusillit sananeqaataasigut kingornuttagaasunit isumalluutit pillugit ilisimasanik katersisarnerup tamanullu saqqummiussisarnerup siuarsarneqarnissaa, siunertaallutik.

Nunani allani misilittakkat takutippaat, uumassusillit sananeqaataasigut kingornuttagaasunit isumalluutininut suliassaqarfiup iluani siuariartorneq, nunap suminngaaneerfiusup nalilinnit ajunngitsorsiasanillu naapertuilluartumik pissarsitinneqarneranik tamatigut kinguneqartanngitsoq.

Kalaallit Nunaata nunani tamalaani malittarisassat malitassallu malissagai, aammalu uumassusillit sananeqaataasigut kingornuttagaasunit isumalluutinik atuinermi pisinnaatitaaffigisatsitut aningaasaqarnikkut inuiaqatigiinnilu iluaqutissartaasunik inuiaqatigiit kalaallit pissarsiaqartinneqarnissaasa qulakkeerneqarnissaa, inatsisissatut siunnersuummi qulakkeerneqassaaq.

Taamatut oqaaseqarlunga siunnersuutip Inatsisartuni suliarineqarnissaa inassutigaaara.